

Te Kēmu

nā Ropene Mio

Amokura

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. He tākaro kei te haere. He aha te kēmu?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te taitara o te pukapuka. Rarangatia ngā kēmu ka taea i rō whare, i waho rānei. Rarangatia ngā āhua rerekē o ngā rōpū tākaro?

He aha i mau kākahu orite ai ngā rōpū tākaro.

Matapakia te mōhio o te ākonga ki te mau tētahi ārai waha.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.



Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o te pukapuka?
2. Ko wai mā e mau ana i ēnei kākahu?
3. He aha te tikanga a te ārai waha?
4. Kei whea te tīma e tākaro ana?
5. Ki ōu whakaaro, he kēmu pai tēnei? He aha ai?

Ngā whakautu ki ngā whakapuaki māramatanga

1. Ko ngā kākahu me ngā taputapu tākaro whutupōro.
2. Ko te tīma, ko ngā tama rānei.
3. Ka tiaki i ōna niho.
4. Kei te papa whutupōro.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

T He tāutu i tētahi raupapatanga.

He whakatakinga ā-roro, he whakaharatau

I mua i te pānui pukapuka, matapakia te mōhio o te ākonga ki te tākaro i tēnei kēmu. Whakawhiti kōrero mō ngā kākahu tika mō tēnei kēmu.

Kia oti i te ākonga te pānui, matapakia he aha te tino take o tēnei kēmu? Whakawhiti kōrero mō ētahi o ngā tikanga e pā ana ki te kēmu whutupōro.

Matapakia ētahi atu kēmu i tākaro ai te ākonga.